

# EL ROBO DELE ANGURIE

Alcoanti scapoli de San Giuseppe, como Albanoti, Terci, Bepi, i era propio na calamità, diseva sempre el nono Bona. Questa calamità l'includeva robar galine, robar ùa, robar angurie, darghe peae ntel culo ai cavai che no i voleva tirar el veršor o la slita o anca la carossa, far vegner-do saši dai monti, bagnar-se nui do al fiume, begar e spacar-su nasi ai altri ntei bali e coši via. Ma se i feva tuti questi dispeti l'era per "farra" e nò per mala educacion o formacion, quei benedeti de Dio, concludeva sempre la santola Teresina. E mai stai metui in prison quei permalosi — spuava tra i denti e la pipa — el delegado de pulissa Toni.

Con la luna piena, sul colmo, le morose con voia de magnar angurie (senò gnente de gatùssole) gh'era propio bisogno de robar-ne alcoante. Magineve se podê lasciar le morose dele bele gambe e checote roèe senza angurie!

— Ndove le robenti?

— Su al monte del nono Osti.

— Ma podon čiapar na sčiopetà. Saeo che l'ha armà el sčiope in medo ale angurie?

— Tuto busie. Vegnê che nden.

L'anguriale del nono Osti l'era belo. L'è stà mpiantà-su na montera e l'era colmo de angurie, una pu grande de l'altra. In medo ale angurie ghera alcoanti sochi negri perchè l'è stà fato en taio al boschetto, brùsa-su la capoera, sapà e mpiantà angurie.

Con sachi de rufo, i scapoli Albanoti, Terci, Bepi e Miguel, come ladri, scondendo-se quà a là ziti, ziti soto el chiaro dela luna, uno drìo l'altro como le formighe, spaurai, su pel monte. I se ferma davanti al 'anguriale e sotovoce:

— Dio, che bele angurie!

— Nden pian-pian per no pestarghe-su ai rami.

— Quela là la gha dàver oto quili!

— Quante mbinenti-su?

— Bateghe-su coi dei per veder se le è maure.

— Voi saer quanti sachi mbinenti.

— Basta trê.

— Allora basta. Vegnê che nden. Ghenen a sè. En d'elo ndà Albanoti?

— L'è lašù, vecin a quel soco negro.

— Ndenti?

— Spetê en pochetin. Ghò voia de magnarne una adešo.

— La magnen con le morose. Vei, Albanoti.

In medo ai sochi negri, senta-do, endormensà soto na squerta negra, con scïopo en man, nono Osti, mpareva na soca.

— Spetê che spaco questa, quà.

E Albanoti con n'anguria su i nove quili s'avicina del soco negro e PLAC!, propio su la testa de nono Osti. Col colpo, nono Osti casca avanti e el scïopo spara. I scapoli i hatrato in tera i sachi pieni e lori e angurie a rudolar-do pel monte e crii del nono Osti: Madona mia, i ma spacà la testa! Signoredio, quanto sangue! Son morto! Son morto! ... ma quando el sà percebù che no l'era sangue ma brodo d'anguria, la tacà a bestemiar: maledeti, cramento, ve copo! Orcopotani, ve sbudelo! Dà n'altra scïopetà e i scapoli in medo ale angurie, peae, cascae, pu in do e entro ntei spineri...

Trê dì dopo, nono Osti al bar de Tiberio raccontava: i bugheri o i negri o forsi anca i brasilianoti i ha fato en desio nel me anguriale. I ha ruinà-su tuto. Ma ti, Terci, coèa óstia ghetto nte la gamba?

— Ah! La me gamba? Tigiuro — si nono, ho čiapà na canelà al zugo dela bola.

— Ma varda-vè! E anca Albanoti el sà fato male ale culate no l'è vero? E perchè Miguel el sà fato-su el brasso?

— Nono, domandeghe a Bepi che l'è trê dì che stà a leto con ficon ntel pè.

